



Il rave-party dai microbis.

Al scuen sei cussì se a ogni cjanton si cjatin boçs di licuit iggienizant, e cartei cun fotos e dissens su cemût lavâsi lis mans... Sot, sore, tal mieç dai dêts... o nus cjapin par stupits, o achì nol è dut come che si pense!

Beh, dopo dîs di ospedâl o ai scuivert che la seconde ipotesi e je chê juste e, soredut, che a son cragnôs. E nol è un plurâl masculin gjeneric: i oms a àn cualchi fastidi cul lavandin!

Cuant che par un motîf o par chel altri il mont al comence e al finìs tal repart dal ospedâl, il temp si scuen pûr fâsal passâ... E alore fûr che e salti la mè inventive e vie cul esperiment, o miôr cuntune ricercje un pôc sociâl e un pôc sessuâl: la int si lavie lis mans prime di jessî dal bagn?

Prime dificoltât: studiâ il plan di atac pe osservazion. Nol è che o pues metimi cun tacuin e lapis, sentade su la basse dal barcon a catalogâ ducj chei che a van dentri e fûr... I prins dîs ju passi a studiâ il plan dal trafic e, come i tecnics dal comun, o buti jù il gno PLD: Plan Lavade Dincj.

Tra spacetic, fil e colutori indi viôt une par colôr.

Prime anotazion: lis feminis mi stufin daurman. Masse precisiss, dutis ubidientis cul lôr lavôr di fin sot de aghe che e cor cjalde al pont just. Furbis come bolps, jessint no tocjin nancje la mantie de puarte, parcè che lôr lu san... lis feminis lu san simpri!

I oms invezit, dute une sorprese.

Svolta nelle indagini: l'obietîf dal scandai al devente premiâ i trê oms plui origjinâi tal lôr rapuart cul lavandin. Mission spinghinose viodût che il 99% di chei dal repart si smentee di vê lis mans daspò di vê tirade le aghe! E veju ca i "magnifici tre" dal nosocomi furlan, chei che dal podi no ju bute jù nissun, nancje cul idrant.

Tierce posizion: Mister "puarte vierte", chel che "parcè aio di sierâle se o fâs dome la pipì?". Po al va fûr cence il pit-stop dal lavandin, nancje dîlu..

Seconde posizion: Mister "belli capelli", chel che al vierç il rubinet e al passe lis mans par un secont sot de aghe, e jo o pensi "beh, miôr di nuie"... Pecjât che al sei dome un truc par sistemâsi ben i riçots!

E par finî il vincidôr: Mister "crocs", chel che al vierç la aghe, al cjol lis salvietis di cjarte e mi fâs pensâ "e je fate, cumò si insavone e vie!". E invezit lui ce fasial? Lis bagne, lis met dentri tes çavatis, e vie lizér come un çupet viers dal so jet.

Doman mi dimetin, usgnot mi lavi i dincj in cjamare.

*di Eowin*